

Kerja Sosial Puteri UMNO: Satu Tinjauan

MAT ZIN MAT KIB & SHIREEN HARON

ABSTRAK

Perbincangan kertas kerja ini tertumpu kepada budaya kesukarelawanan Pergerakan Puteri UMNO amnya dan Bahagian Sepanggar, Sabah khususnya. Ahli Pergerakan ini pada keseluruhannya adalah terangkum dalam golongan belia kerana ahli-ahlinya terdiri daripada kalangan wanita yang berumur 35 tahun ke bawah. Tulisan ini cuba memberi tumpuan kepada tiga perkara, iaitu (1) mengenal pasti kerja-kerja sukarela yang dibuat oleh mereka, (2) mencari sebab/faktor yang menarik Pergerakan untuk terlibat dalam kerja-kerja kesukarelawanan dan (3) halangan-halangan yang dihadapi oleh Puteri UMNO dalam usaha mereka untuk menjana lagi kerja-kerja kesukarelawanan. Penulis juga cuba melihat bahawa betapa pentingnya semangat kesukarelawanan dijadikan satu budaya yang berterusan yang sepatutnya diamalkan oleh Puteri UMNO tanpa menyerlahkannya sebagai gerakan parti politik, iaitu dengan memberi khidmat sukarela kepada semua golongan wanita tanpa mengira fahaman politik. Budaya kesukarelawanan Puteri UMNO ini akhirnya pasti akan dapat menarik golongan belia wanita dan juga masyarakat keseluruhannya untuk memberi sokongan kepada gerakan parti, khususnya UMNO dan Barisan Nasional setelah para ahli Pergerakan itu dan masyarakat keseluruhannya memahami betapa pentingnya sokongan mereka dalam menegakkan sebuah negara demokrasi.

Kata kunci: *Belia , Budaya Kesukarelawanan, Kerja Sosial, Puteri UMNO, Parti Politik*

ABSTRACT

This working paper will focus discussion on the culture of volunteerism among the Puteri UMNO (PUTERI) movement, especially in the Sepanggar division and in UMNO itself as a whole. Members of PUTERI UMNO are included within the youth category. Most members are women below 35 years of age. This working paper attempts to focus on 3 items, namely, (1) to identify voluntary work carried out by PUTERI UMNO, (2) to find out reasons/factors that attract PUTERI UMNO to be involve in voluntary work and (3) challenges faced by PUTERI UMNO in their effort to generate more voluntary work. The author also attempts to see the importance of the spirit of volunteerism as a culture that should be continued by PUTERI UMNO without having to present its work as a political party movement, meaning by providing voluntary services to all women regardless of political belief. The spirit of volunteerism shown by PUTERI UMNO will then be able to attract more young women and the public in general to support the party movement, especially UMNO and the National Front (Barisan Nasional) once members of PUTERI and the community as a whole understand the importance of their support in building a democratic country.

Key words: *Youth, Culture Of Volunteerism, Social Work, Puteri UMNO, Political Parties*

PENGENALAN

Artikel ini membincang tentang kerja sosial dan amalan budaya kesukarelawanan² Pergerakan Puteri UMNO. Tumpuannya ialah kepada Pergerakan Puteri UMNO Malaysia amnya, Bahagian Sepanggar, Sabah khususnya. Ahli Pergerakan ini pada keseluruhannya adalah terangkum dalam golongan belia kerana golongan ini menetapi definisi belia yang berdasarkan umur, iaitu golongan lelaki dan wanita yang berumur 15-40 tahun³ dan ini kerana ahli-ahlinya terdiri daripada kalangan wanita yang berumur 35 tahun ke bawah.⁴ Pembentukan golongan puteri sebagai Pergerakan dalam parti politik bukan sahaja terdapat dalam UMNO tetapi PAS (Parti Islam Se Malaysia) telah menubuhkan pergerakan puterinya dengan nama Unit Amal Nisa' manakala Parti Kongres India Malaysia pula turut menubuhkan Pergerakan Puterinya. Pembentukan pergerakan seumpama ini, termasuk juga dengan golongan lelaki belia bagi semua parti politik di Malaysia, contohnya Pergerakan Pemuda UMNO, Pergerakan Putera UMNO, Angkatan Muda Keadilan, Dewan Pemuda PAS kerana melihat bahawa golongan belia merupakan salah sayap penting dalam mana-mana pertubuhan politik dan mereka adalah golongan pelapis yang akan meneruskan kesinambungan kepimpinan negara. Kesedaran mereka tentang tanggungjawab belia bagi merealisasikan impian negara untuk melahirkan pemimpin-pemimpin yang berkaliber dalam arena politik Malaysia. Malah mengikut Azizan (1995: 23) terdapat segelintir masyarakat yang cuba memperkecilkan idealisme belia ini dan kelompok masyarakat ini tidak sedar bahawa sumber kekuatan dan asas pengorbanan yang semula jadi datang daripada perjuangan golongan belia.

SEJARAH PENUBUHAN PUTERI UMNO

Penubuhan Pergerakan Puteri UMNO adalah telah diilhamkan oleh Azalina (kini Datuk) Dato' Othman Said yang telah dilantik sebagai Ahli Majlis Tertinggi UMNO pada Jun 2000. Mengikut beliau, beliau sedar berdasar keputusan pilihan raya umum 1999,

²Budaya kesukarelawanan dalam artikel ini merujuk kepada amalan yang dibuat oleh Pergerakan Puteri UMNO dan ahli-ahlinya dengan kehendak mereka sendiri dan tanpa menerima apa-apa bayaran atau upah daripada "pelanggan" mereka.

³ Rumusan penulis berdasarkan Hussain Mohamed, *Belia di Malaysia: Masalah, Gerakan dan Masa Depan*, Aneka Publishing, Kuala Lumpur, 1997 dan UNESCO, in Partnership with Youth, France, 1969.

⁴Kiraan umur ini dikira berdasarkan pada 1 Januari tahun berkenaan dan ahli belum lagi menjadi ahli Wanita UMNO. Lihat Fasal 4.1.1, *Pertubuhan Kebangsaan Melayu Bersatu: Peraturan Puteri UMNO*, hlm. 2 dan Fasal 21.2, *Perlembagaan UMNO* (cetakan ke-2), (dipersetujukan dalam Persidangan Perhimpunan Agung Khas UMNO, pada 18 November 2000), hlm. 65.

UMNO tidak lagi relevan: orang Melayu tidak menghormati UMNO; UMNO tidak dapat memikat golongan muda; orang-orang politik tidak lagi dihormati.⁵

Atas kesedaran inilah, Azalina, dalam jangka masa antara Julai dan Ogos 2000, telah mengemukakan kertas cadangan setebal 13 halaman kepada Majlis Tertinggi UMNO.⁶ Cadangan penubuhan Pergerakan ini diputuskan dalam Mesyuarat Khas Majlis Tertinggi UMNO pada 10 Julai 2000. Mesyuarat ini membuat keputusan bersetuju secara prinsipnya menubuhkan Pergerakan Puteri UMNO dengan satu harapan dan tugas besar Pergerakan untuk menarik lebih ramai menyertai UMNO.⁷ Kemudian pada Mesyuarat Majlis Tertinggi UMNO pada 31 Mac 2001, telah melantik secara rasmi Azalina sebagai Ketua Penaja Pergerakan Puteri UMNO dan 9 April 2001, Pergerakan ini diperkenalkan kepada umum manakala pelancarannya telah dibuat oleh Y.A.B. Datuk Seri Dr Mahathir Mohamad, Presiden UMNO pada 3 Ogos 2001 di Pusat Dagangan Dunia Putra (PWTC), Kuala Lumpur. Azalina telah mengetuai Pergerakan ini setelah menang tanpa bertanding dalam Perhimpunan Agung Pertama Pergerakan Puteri UMNO Malaysia.⁸

Usaha Pergerakan ini menarik golongan wanita muda menyertai UMNO adalah sesuatu yang menggalakkan, contohnya sebanyak 45% gadis yang berumur 18-26 tahun telah menyertai Pergerakan ini⁹ dan dalam Bahagian Sepanggar, Sabah sahaja, sebagai contoh, ahli Pergerakan ini adalah seramai 453 orang.¹⁰ Dalam usaha untuk menarik dan “mengikat” para puteri dan masyarakat kepada UMNO, Pergerakan ini melihat dan percaya bahawa melalui kerja-kerja sukarela, usaha ini dapat direalisasikan.

KAJIAN LITERATUR

Tulisan ilmiah tentang Pergerakan ini, sehingga kini belum lagi ditemui. Walau bagaimanapun sebuah karya yang berjudul *Puteri UMNO: Kuasa Politik Baru Malaysia* telah ditulis oleh Hambali Abdul Latiff dan Fadzil Abdul Rahman yang diterbitkan 2001. Karya ini memberi tumpuan kepada penubuhan Pergerakan Puteri UMNO dan membincangkan tentang bagaimana dan sebab musabab yang mendorong penubuhannya. Sesuai dengan tajuk bukunya, penulis buku ini telah melihat bahawa Pergerakan ini merupakan satu angkatan baru yang ahlinya terdiri daripada wanita muda Melayu dan ini

⁵Temu bual dengan Datuk Azalina Dato' Othman Said, Ketua Pergerakan Puteri UMNO Malaysia pada 17 Mac 2003, di Kota Kinabalu. Lihat juga Hambali Abdul Latif & Fadzil Abdul Rashid, *Puteri UMNO: Kuasa Politik Baru Malaysia*, Penerbit Wadah Karya, Selangor, 2001, hlm. 3-5.

⁶*Ibid.*, hlm. 3.

⁷*Ibid.*, hlm. vii.

⁸Untuk maklumat lanjut, lihat *Aliran*, vol. 22, no. 8, 22.

⁹*Berita Harian*, edisi Sabah & Sarawak, 8 September 2003, hlm. 1.

¹⁰Temu bual dengan Aziah Atoh (26 tahun), Ketua Pergerakan Puteri UMNO Bahagian Sepanggar pada 23 September 2003, di Rumah UMNO Gaya, Jalan Saga Likas, Kota Kinabalu.

tidak senangi oleh Pergerakan Wanita UMNO. Karya ini turut memuatkan gambar-gambar aktiviti Pergerakan Puteri UMNO dan juga lampiran ucapan Presiden UMNO pada Perhimpunan Agung Khas UMNO 18 November 2000 mengenai Pindaan Perlembagaan yang menyentuh tentang Pergerakan Puteri dan juga ucapan Azalina Othman Said, Ketua Penaja Pergerakan Puteri UMNO pada Perhimpunan Agung UMNO 2001 pada 21 Jun 2001. Sumber rujukan karya ini banyak bersandarkan kepada akhbar arus perdana seperti *Berita Harian* dan *Utusan Malaysia* yang memuatkan rencana dan berita tentang Puteri UMNO. Memandangkan tidak banyak karya tentang Pergerakan ini, buku *Puteri UMNO: Kuasa Politik Baru Malaysia* bolehlah dijadikan rujukan awal.

KAEDAH PENYELIDIKAN

Kajian ini menggunakan kaedah penyelidikan kualitatif. Aspek kualitatif dalam kajian ini merangkumi kaedah pemerhatian, temu bual dan kajian perpustakaan. Responden yang dipilih dalam kaedah temu bual ini tokoh-tokoh Puteri UMNO, telah berjaya mendapat maklumat sahih secara langsung tentang Pergerakan ini. Kajian perpustakaan pula, penulis banyak merujuk kepada surat khabar akhbar arus perdana seperti *Berita Harian* dan *Utusan Malaysia* yang memuatkan rencana dan berita tentang Puteri UMNO. Selain itu, penulis juga mendapatkan maklumat untuk tulisan ini daripada Penyata Tahunan Perhimpunan Agung Pergerakan Puteri UMNO.

PERBINCANGAN

Artikel ini juga memberi tumpuan kepada tiga perkara, iaitu (1) mengenal pasti kerja-kerja sosial yang dibuat oleh Pergerakan Puteri UMNO, (2) mencari sebab/faktor yang menarik golongan Puteri untuk terlibat dalam kerja-kerja sosial dan (3) halangan yang dihadapi oleh Pergerakan ini dalam usaha mereka untuk menjana lagi kerja-kerja sosial. Kajian juga cuba melihat bahawa betapa pentingnya semangat kerja sosial dan kesukarelawanan dijadikan satu budaya yang berterusan yang sepatutnya diamalkan oleh ahli Pergerakan ini tanpa menyerlahkannya sebagai gerakan politik, iaitu dengan memberi khidmat sukarela kepada semua golongan wanita tanpa mengira fahaman politik, walaupun akhirnya nanti pasti akan dapat menarik golongan belia wanita untuk memberi sokongan kepada gerakan parti, khususnya UMNO setelah para Puteri memahami betapa pentingnya sokongan mereka dalam menegak sebuah negara demokrasi.

KERJA-KERJA SUKARELA PUTERI UMNO

Budaya kesukarelawanan Pergerakan Puteri UMNO adalah menjadi salah satu tujuan dalam usaha Pergerakan ini untuk memberi sumbangan dan khidmat mereka kepada masyarakat melalui penglibatan ahli-ahli dalam program yang diatur, sebagaimana yang terdapat dalam Fasal 3 (3.1), Peraturan Puteri UMNO, iaitu:

Menggalakkan ahli-ahlinya mengambil bahagian aktif dalam kegiatan-kegiatan sukarela, agama, politik, ekonomi, pendidikan, kesihatan,

*perkhidmatan masyarakat dan kebudayaan.*¹¹

Bersesuaian dan dengan tujuan untuk memenuhi tujuan di atas, Pergerakan ini telah mengatur pelbagai program, termasuklah program sukarela. Program sukarela ini kebanyakannya merangkumi aspek pendidikan dan kesihatan yang bercorak perkhidmatan masyarakat.¹² Sebagai contoh, Pergerakan Puteri telah membina pusat tuisyen untuk kanak-kanak yang tidak kemampuan di Flat Taman Sri Manja, Petaling Jaya dan Sungai Tiang, Yan, Kedah. Di kelas ini kanak-kanak berpeluang belajar bahasa Inggeris dan tulisan jawi. Tujuan pusat ini ialah untuk membantu kanak-kanak yang mempunyai masalah kewangan dalam mendapatkan pendidikan sampingan selain dari menghadiri persekolahan biasa. Usaha ini merupakan satu iltizam untuk menaiktarafkan pendidikan dan membina masyarakat majmuk (khususnya di kawasan bandar) yang berilmu.¹³ Selain program sukarela yang dinyatakan, mereka juga telah mengadakan program pendidikan seperti Seminar Kecemerlangan SKOR “A” SPM, *English on Wheel* dan lain-lain lagi.¹⁴

Tumpuan juga diberikan kepada kerja-kerja sosial yang berbentuk kebajikan. Pergerakan ini menyedari bahawa masalah sosial yang melibatkan para belia wanita pada masa ini, contohnya pencabulan ke atas hak wanita, sumbang mahram dan beberapa keganasan dan jenayah seks yang dilakukan terhadap wanita, khususnya para belia. Bagi memberi kesedaran kepada golongan belia wanita tentang gejala sosial ini, Pergerakan ini telah mengadakan Kempen Wanita Alaf Baru (WABA).¹⁵ Kempen ini diinspirasikan oleh Biro Perundangannya dan usaha ini merupakan ilham dan keprihatinan untuk membanteras gejala sosial amnya dan keganasan seksual khasnya. Moto kempen ini ialah “Hentikan Keganasan, Semaikan Kasih Sayang”.

Bagi membantu masyarakat yang mempunyai masalah dan berhasrat untuk mendapat khidmat dan bantuan guaman, termasuk yang terlibat dengan gejala sosial dan keganasan seksual, klinik guamannya dibuka secara percuma di Stesen Putra *Light Rail Transit Kuala Lumpur City Centre*.¹⁶ Kedudukan klinik guaman di tempat terbuka yang menjadi tumpuan ramai, khususnya golongan belia akan memudahkan mereka yang terlibat untuk mendapat khidmat dan bantuan guaman. Usaha ini sepatutnya dimanfaatkan oleh setiap lapisan masyarakat tanpa mengira ideologi politik.

¹¹Lihat Fasal 4.1.1, *Pertubuhan Kebangsaan Melayu Bersatu: Peraturan Puteri UMNO*, hlm. 1.

¹²Penulis sekadar memberi beberapa contoh sahaja.

¹³*Suara Puteri*, Bil. 1 Jun 2002, hlm. 4 dan lihat juga <http://www.puteri.net.my>.

¹⁴ Program ini pernah dibuat oleh P3 UMNO Bahagian Sepanggar. Temu bual dengan Aziah Atoh (26 tahun), Ketua Pergerakan Puteri UMNO Bahagian Sepanggar pada 23 September 2003, di Rumah UMNO Gaya, Jalan Saga Likas, Kota Kinabalu.

¹⁵Kempen dilancarkan pada 16 Februari. Lihat *Suara Puteri*, Bil. 1 Jun 2002, hlm. 5.

¹⁶Pusat ini dibuka pada 8 Mac 2002, iaitu Hari Wanita Sedunia. Lihat *Suara Puteri*, Bil. 1 Jun 2002, hlm. 5.

Seperti yang pernah ditonton di kaca televisyen dan terpapar dalam akhbar-akhbar tempatan, ahli-ahli Pergerakan ini juga membuat kerja-kerja sukarela seperti memberi bantuan kepada mangsa kebakaran, membersihkan tanah perkuburan, membantu golongan yang kurang bernasib baik, memberi bantuan kepada ibu tunggal, membuat lawatan ke rumah orang tua, mengadakan lawatan terhadap pesakit-pesakit di hospital, mengadakan kempen derma darah, program membaca bagi golongan buta, membersihkan rumah orang-orang tua, membawa saudara baru ke hospital untuk mendapat rawatan, dan lain-lain lagi.¹⁷ Sebagai contoh, Pergerakan Puteri UMNO Bahagian Sepanggar, Sabah pernah membuat lawatan ke Hospital Queen Elizabeth Kota Kinabalu, semasa pilihan raya kecil Dewan Undangan Negeri Likas.¹⁸ Pergerakan Puteri UMNO Badan Perhubungan Negeri Sabah pula pernah membuat aktiviti gotong-royong membina jambatan dan bersama-sama dengan St. John Ambulan Malaysia membuat pemeriksaan kesihatan penduduk di Kampong Jambongan Sandakan.¹⁹

Puteri UMNO sebagai pergerakan yang keahliannya terdiri daripada kaum-kaum wanita yang berada pada usia remaja, Pergerakan ini juga mengadakan aktiviti sukarela yang berasaskan kepada penjagaan kecantikan seperti Bengkel Kecantikan Gaya, Seminar Keterampilan Wanita Alaf Kini, Penerangan Produk dan Cara Pemakaian Yang Betul dan lain-lain lagi.²⁰ Aktiviti-aktiviti seperti ini telah dapat menarik kaum-kaum wanita yang umurnya menjangkau umur Puteri.

Kerja kesukarelawanan Pergerakan Puteri UMNO Malaysia tidak terhad di Malaysia sahaja. Pergerakan ini juga telah mengambil inisiatif untuk membangunkan projek pembinaan sekolah di Kabul yang terpaksa dibangunkan semula akibat daripada serangan tentera bersekutu Amerika Syarikat.²¹ Pergerakan ini telah menyalurkan sebanyak RM 45,000.00 kepada Tabung Pendidikan Afghanistan kepada Duta Afghanistan untuk menubuhkan sebuah sekolah di Afghanistan.²² Ini dilihat sebagai satu usaha bahawa Pergerakan ini meletakkan kerja-kerja sukarela ini sebagai tanggungjawab sosial tanpa mengambil kira sempadan negara dan soal politik kerana di Kabul tidak ada rakyatnya yang menjadi ahli pertubuhan parti di Malaysia baik UMNO mahupun apa jua parti politik.

¹⁷Hambali Abdul Latiff & Fadzil Abdul Rashid, *op. cit.*, hlm. 22-23 dan 100-106.

¹⁸Temu bual dengan Cik Rosnah Abdul Rashid Shirlin (31 tahun), Ketua Pergerakan Puteri UMNO Negeri Sabah, pada 26 Mac 2003 di Pejabat Puteri UMNO Sabah, Pejabat Badan Perhubungan UMNO Negeri Sabah dan Aziah Atoh (26 tahun), Ketua Pergerakan Puteri UMNO Bahagian Sepanggar pada 23 September 2003, lihat juga *Puteri UMNO*, Bil. 2, Ogos 2001, hlm. 17.

¹⁹http://stjohnkk.tripod.com/album_khidmat_bp.htm.

²⁰Puteri UMNO_website\Aktiviti.mht.

²¹*Berita Harian*, 2 Oktober 2003, hlm. 4.

²²*Berita Harian*, edisi Sabah & Sarawak, 8 September 2003, hlm. 1.

KENAPA PUTERI MELIBATKAN DIRI DALAM KERJA KESUKARELAWANAN?

Menyedari hakikat keputusan pilihan raya umum 1999 yang menunjukkan bahawa sokongan muda terhadap pihak pembangkang kian meningkat, iaitu 40% daripada 141,000 ahli Pemuda PAS adalah terdiri daripada mereka berumur 24 tahun ke bawah manakala Parti KeAdilan pula merangkumi 56% ahli dari kalangan pemuda,²³ Azalina merasai bahawa UMNO hendaklah lebih rendah diri dan perlu menjalankan aktiviti-aktiviti serta program yang lebih menarik golongan muda supaya mereka merasakan bahawa UMNO tetap relevan.²⁴

Kesedaran ini telah mendorong Pergerakan Puteri UMNO Malaysia membuat program *outreach* dan membuang “imej makcik” yang ada pada Pergerakan Wanita UMNO buat sekian lama.²⁵ Bagi Azalina, UMNO mesti berubah dari dalam sekiranya UMNO mahu diterima oleh kaum muda. Perubahan-perubahan yang dibuat oleh Pergerakan ini adalah melalui programnya yang bersifat “sebaya dengan orang muda”. Azalina juga menyebut semasa temu bual dengan penulis, bahawa ahli-ahli Pergerakan ini akan meletak soal kebajikan sebagai agenda utama dalam program Pergerakan itu.

Bermula dengan pakaian rasmi Puteri UMNO yang berwarna merah muda yang membawa mesej lembut, muda, bergaya dan bertenaga adalah sesuai dengan cita rasa kegadisan di samping para pemimpinnya pula terdiri daripada rakan sebaya mereka.²⁶ Sebagai orang muda, keghairahan mereka untuk berpolitik seperti para pemimpin di UMNO induk, Pemuda dan Wanita, pada masa ini, tidak menonjol. Ini ada kemungkinan mereka baru dalam soal arena politik di samping Pergerakan ini dilihat masih bersih kerana “kebaruan” mereka ini belum lagi tercalar dengan beberapa label seperti politik wang, jutawan segera, kontraktor muda dan sebagainya.

Pergerakan Puteri UMNO merasa bertanggungjawab untuk memberi sumbangan kepada masyarakat, khususnya orang Melayu kerana mereka menyedari bahawa nikmat pembangunan yang ada pada hari ini masih tidak seimbang.²⁷ Pergerakan ini sedar masih ramai lagi orang Melayu yang mesti diberi kesedaran baik dari segi politik, pendidikan, mahupun pembangunan. Pergerakan ini mampu untuk melunaskan hasrat mereka kerana mereka ada banyak kemampuan apatah lagi sebagai sebuah sayap baru dalam parti yang menjadi tulang belakang yang memerintah Malaysia hari ini.²⁸

²³Hambali Abdul Latiff dan Fadzil Abdul Rashid, *op. cit.*, hlm. 4.

²⁴*Ibid.*, hlm. 5.

²⁵ Temu bual dengan Datuk Azalina Dato' Othman Said pada 17 Mac 2003.

²⁶Sebagai contoh, Ketua Pergerakan Puteri UMNO Bahagian Sepang berumur 26 tahun dan belum berumah tangga.

²⁷Temu bual dengan Datuk Azalina Dato' Othman Said pada 17 Mac 2003.

²⁸Temu bual dengan Aziah Atoh (26 tahun), Ketua Pergerakan Puteri UMNO Bahagian Sepang pada 23 September 2003.

Aktiviti-aktiviti kesukarelawanan ini adalah sesuai dengan semangat kegadisan kerana ada ahli-ahli Pergerakan ini yang baru tamat sekolah dan ada juga yang masih belajar, khususnya di Institut Pengajian Tinggi Awam dengan aktiviti persekolahan mereka.²⁹ Tenaga muda mereka yang masih kuat dan semangat yang berkobar-kobar dapat disalurkan melalui kerja-kerja sukarela yang diatur oleh Pergerakan ini.

HALANGAN-HALANGAN

Dalam usaha melaksanakan kerja sukarela, kebanyakan pertubuhan bukan kerajaan (NGO's) menghadapi halangan-halangan tertentu, khususnya kekangan dari segi kewangan. Masalah ini tidak serius kepada Pergerakan Puteri. Bahkan ahli-ahli Pergerakan ini merasai bertuah kerana mendapat kerjasama daripada jabatan dan agensi kerajaan apabila mereka mengendalikan beberapa program, contohnya mendapat bantuan Jabatan Kebajikan Masyarakat untuk mengenal pasti orang tua yang daif, anak yatim piatu dan ibu tunggal.³⁰ Namun begitu Pergerakan Puteri UMNO tidak terlepas daripada kekangan lain. Usaha dan kerja-kerja kesukarelawan Pergerakan ini dilihat sebagai kegiatan dan mempunyai agenda politik, khususnya oleh parti-parti pembangkang, hinggalah Pergerakan ini dituduh menggunakan pendekatan Zionis.³¹ Usaha mereka juga sering kali dicemuh dan dikait dengan soal-soal peribadi pemimpin dalam Pergerakan Puteri itu sendiri.³²

Walau bagaimanapun, terdapat beberapa program Pergerakan Puteri UMNO kelihatan bertindan dengan program-program yang telah dirancang Pergerakan Wanita UMNO seperti program sukarela berbentuk pendidikan dan kebajikan, dan dirasai tidak perlu diteruskan oleh mereka.³³ Ini dilihat satu pertembungan idea yang kecil pada peringkat awal sahaja kerana dikatakan adanya kepentingan politik di kalangan Pergerakan Wanita UMNO. Walau bagaimanapun, pertembungan idea ini lenyap begitu sahaja setelah, Majlis Tertinggi UMNO melantik Azalina secara rasmi sebagai Ketua Penaja Pergerakan Puteri UMNO pada 31 Mac 2001.

²⁹Temu bual dengan Hasni Opong (28 tahun), Setiausaha Kerja Pergerakan Puteri UMNO Bahagian Sepanggar pada 23 September 2003.

³⁰Temu bual dengan Aziah Atoh (26 tahun), Ketua Pergerakan Puteri UMNO Bahagian Sepanggar pada 23 September 2003.

³¹Hambali Abdul Latiff dan Fadzil Abdul Rashid, *op. cit.*, hlm. 77.

³²Untuk maklumat lanjut, lihat *Suara Puteri*, Bil. 1, Jun 2002, hlm. 5 dan <http://www.puteri.net.my>.

³³Lihat Hambali Abdul Latiff dan Fadzil Abdul Rashid, *op. cit.*, hlm. 11 dan temu bual dengan Puan Jainab Datuk Seri Panglima Haji Ahmad, Ketua Pergerakan Wanita UMNO Bahagian Sepanggar pada 17 September 2003 di pejabat guaman beliau.

CADANGAN DAN KESIMPULAN

Kerja-kerja sukarela Pergerakan ini perlu dilihat sebagai satu usaha yang murni. Sebagai pertubuhan yang bersifat politik, kerja-kerja sukarela ini dikatakan mempunyai serampang dua mata, iaitu untuk memberi khidmat kepada masyarakat dan akan dikatakan ada agenda politik. Walau bagaimanapun masyarakat dari setiap lapisan sudah cukup bijak untuk menimbang khidmat sukarela mereka ini: sesuatu usaha yang baik yang berteraskan kepada nilai-nilai kemanusiaan, tanpa “mengira baju yang mereka pakai”, akan diterima baik. Masyarakat perlu menilai khidmat sukarela yang dapat membantu mereka baik secara jasmani mahupun rohani.

Pergerakan Puteri UMNO pula hendaklah mempunyai daya tahan yang kuat: sanggup menepis segala kecaman dan tuduhan yang bersifat politik. Usaha yang baik, akan tetap baik: bak kata pepatah Melayu kalau asal benih yang baik, jatuh ke laut menjadi pulau; mutiara tetap bercahaya walaupun berada dalam lumpur.

Walaupun bagaimanapun, kerja sukarela Pergerakan ini hendaklah dibuat secara terancang untuk sepanjang masa, tidak pada masa tertentu sahaja khususnya, yang pada kebiasaannya nampak menonjol pada musim pilihan raya sahaja. Kejayaan mengatur program kesukarelawanan sepanjang masa akan menjadi satu budaya dan tidak akan dilihat sebagai agenda politik lagi. Dengan cara inilah Pergerakan Puteri UMNO dapat memikat hati masyarakat yang akhirnya memberi sokongan yang berpanjangan demi menegakkan sebuah negara demokrasi berparlimen di Malaysia.

RUJUKAN

Aliran, vol. 22, no. 8, 22.

Azizan Bahari, *Belia dan masyarakat*. Institut Kajian Dasar, Kuala Lumpur. 1995

Berita Harian, edisi Sabah & Sarawak, 8 September 2003.

Berita Harian, 2 Oktober 2003.

Hambali Abdul Latif & Fadzil Abdul Rashid, *Puteri UMNO: Kuasa Politik Baru Malaysia*, Penerbit Wadah Karya, Selangor, 2001.

Hussain Mohamed, *Belia di Malaysia: Masalah, Gerakan dan Masa Depan*, Aneka Publishing, Kuala Lumpur, 1997.

<http://www.Puteri.net.my>.

http://stjohnkk.tripod.com/album_khidmat_bp.htm.

UNESCO, in Partnership with Youth, France, 1969.

Pertubuhan Kebangsaan Melayu Bersatu: Peraturan Puteri UMNO, t. p., t. th., t.t.

Perlembagaan UMNO (cetakan ke-2), (dipersetujuan dalam Persidangan Perhimpunan Agung Khas UMNO, pada 18 November 2000).

Puteri UMNO, Bil. 2, Ogos 2001.

Puteri UMNO_website\Aktiviti.mht.

Suara Puteri, Bil. 1 Jun 2002.

Responden:

Azalina Dato' Othman Said, Ketua Pergerakan Puteri UMNO Malaysia pada 17 Mac 2003, di Kota Kinabalu.

Aziah Atoh (26 tahun), Ketua Pergerakan Puteri UMNO Bahagian Sepanggar, Sabah pada 23 September 2003, di Rumah UMNO Bahagian Sepanggar, Jalan Saga, Likas.

Hasni Opong (28 tahun), Setiausaha Kerja Pergerakan Puteri UMNO Bahagian Sepanggar pada 23 September 2003, di Rumah UMNO Bahagian Sepanggar, Jalan Saga, Likas.

Jainab Datuk Seri Panglima Haji Ahmad, Ketua Wanita UMNO Bahagian Sepanggar, pada 17 September 2003 di pejabat guaman beliau.

Rosnah Abdul Rashid Shirlin (31 tahun), Ketua Pergerakan Puteri UMNO Negeri Sabah, pada 26 Mac 2003 di Pejabat Puteri UMNO Sabah, Pejabat Badan Perhubungan UMNO Negeri Sabah.

Profil Penulis

Mat Zin Mat Kib

Profesor Madya

Fakulti Sains Pentadbiran dan Pengajian Polisi

Universiti Teknologi MARA

Sabah.

Shireen Haron, PhD

Profesor Madya

Penolong Naib Canselor

Institut Kualiti dan Pengembangan Ilmu

Universiti Teknologi MARA

Shah Alam.

shireen738@salam.uitm.edu.my